



# Post specialisà e da coordinaziun per la protecziun d'uffants

Cuira, ils 3 d'avrigl 2024

## Survista curta

Per cuntanscher uffants e giuvenils ch'èn pertutgads da violenza, defineschan las participantas ed ils participants da la Cumissiun specialisada per la protecziun d'uffants e per l'agid a la giuventetgna il basegn da sustegn per personas specialisadas dal proxim conturn dals uffants e giuvenils. Questas personas pon sa laschar cussegljar oz en moda anonima tar la APUC u p.ex. tar l'Agid a victimas, sch'ellas supponan ch'il bainstar da l'uffant saja periclità. Personas specialisadas da l'Agid a victimas rendan attent ad in augment considerabel da las dumondas che vegnan inoltradas da personas specialisadas. Er ulteriuras participantas e participants da la cumissiun specialisada accentueschan il basegn da sustegn per personas specialisadas e la complexitad dals cas.

Ina periclitaziun dal bainstar da l'uffant na sa lascha savens betg identifitgar cleramain e las situaziuns èn bleras giadas pretensiusas. Igl exista il privel, che personas creschidas dal conturn da l'uffant na daventan – per mancanza da savida – betg activas, schebain ch'ellas san ch'il bainstar da l'uffant è periclità. Per salvar il bainstar da l'uffant èsi necessari che las situaziuns vegnian identifitgadas baud e che las personas specialisadas, che lavuran mintga di cun uffants e giuvenils, vegnian encuraschadas d'observar la situaziun e da daventar activas en cas da basegn. Per quest intent vegn il sustegn professional rinforzà p.ex. per la magistraglia, per lavureras socialas e lavurers socials, per il persunal d'assistenza en canortas d'uffants u per cussegljadras e cussegljaders da mammas e da babs. Quai funcziuna sche:

- la purschida da cussegljaziun da l'Agid a victimas è concepida en moda pli nunbirocratica ed è enconuschenta
- ils posts da consultaziun èn cuntanschibels grazia ad ina buna triascha che correspunda als basegns
- las acturas ed ils acturas en il sector da la protecziun d'uffants èn entretschads pli fitg
- ina gruppa da focus cussegla las personas specialisadas

La finamira è da porscher il sustegn professional che las personas specialisadas dovran per pudair intervegnir en moda cumpetenta en cas da basegn.

In mussavia infurmescha e sensibilisescha plinavant las personas specialisadas per situaziuns, en las qualas il bainstar da l'uffant è smanatschà. Il mussavia sa referescha a la pratica e visualisescha in proceder pussaivel en cas ch'ina periclitaziun dal bainstar da l'uffant vegn supponida.